

Rapport Openheitslova Steinvik 2024

Dokumentet er signert digitalt av følgende undertegnere:

- Vassbotten, Marte (04.08.1987), signert 26.06.2025 med Signicat Sign BANKID
- Vassbotten, Alex (13.11.1962), signert 27.06.2025 med Signicat Sign BANKID
- Vassbotten, Erlend (02.01.1990), signert 26.06.2025 med Signicat Sign BANKID
- Haugen, Reidar (15.05.1963), signert 26.06.2025 med Signicat Sign BANKID
- Vassbotten, Inge Helge (23.02.1942), signert 27.06.2025 med Signicat Sign BANKID
- Aarskog, Alf-Helge (17.05.1967), signert 26.06.2025 med Signicat Sign BANKID



Det signerte dokumentet innholder

- En forside med informasjon om signaturene
- Alle originaldokumenter med signaturer på hver side
- Digitale signaturer



Dokumentet er forseglet av Posten Norge

Signeringen er gjort med digital signering levert av Posten Norge AS. Posten garanterer for autentisiteten og forseglingen av dette dokumentet.



Slik ser du at signaturene er gyldig

Hvis du åpner dette dokumentet i Adobe Reader, skal det stå øverst at dokumentet er sertifisert av Posten Norge AS. Dette garanterer at innholdet i dokumentet ikke er endret etter signering.



Aktsemdsvurdering

Steinvik 2024



Dokumentet er signert digitalt av:

- Vassbotten, Marte (04.08.1987), 26.06.2025
- Vassbotten, Alex (13.11.1962), 27.06.2025
- Vassbotten, Erlend (02.01.1990), 26.06.2025
- Haugen, Reidar (15.05.1963), 26.06.2025
- Vassbotten, Inge Helge (23.02.1942), 27.06.2025
- Aarskog, Alf-Helge (17.05.1967), 26.06.2025

Forseglet av



Posten Norge

Innhald

Om Steinvik og vårt ansvar etter Openheitslova	1
Slik gjennomfører vi aktsemdsvurderingar – metode og risikobilete	3
Ansvarleg drift – Vurdering av eiga verksemd og risikobilete.....	3
Kartlegging av leverandørkjeda – områder med høg risiko	5
Tiltak og mål for ansvarleg drift – slik jobbar vi med forbedring.....	8
Kommunikasjon med påverka partar og rettshavarar	9
Gjenoppretting og erstatning	9

Om Steinvik og vårt ansvar etter Openheitslova

Denne rapporten presenterer konsernet Steinvik si aktsemdsvurdering i tråd med Openheitslova (§4 og §5), for perioden 1. januar – 31. desember 2024. Rapporten gjev ei oversikt over korleis Steinvik arbeider med å identifisere, vurdere og handtere faktiske og potensielle negative konsekvensar for menneskerettar og anstendige arbeidsforhold i eiga verksemd og leverandørkjede. Rapporten omfattar følgjande selskap i konsernet:

- Steinvik Fiskefarm AS
- Steinvik Fiskefarm Visningssenter AS
- Barlindbotn Settefisk AS
- Breivika Eigedom AS
- Bru Eigedom AS
- Steinvik Rensefisk AS

Steinvik Rensefisk AS er ikkje pliktsubjekt etter Openheitslova, men er likevel inkludert i konsernet sine aktsemdsvurderingar grunna verksemdstype og innkjøpsaktivitet. Loke Eigedom AS (morselskapet), Steinvik Eigedom AS og Onshore Aqua AS er òg ein del av konsernet, men fell ikkje inn under lova. Desse tre er vurderte å ha låg risikoprofil som følgje av verksemdene sin art og avgrensa aktivitet, og er difor ikkje omfatta av denne rapporten.

Steinvik har drift innan store delar av verdikjeda til produksjonen av atlantisk laks og aure. Barlindbotn Settefisk AS er lokalisert i Barlindbotn - her vert Steinvik sin smolt produsert. Konsernet har òg to tilvekstavdelingar i Svelgen – éi for postsmolt og éi for produksjon av rensefisk – som vert drifta av Barlindbotn Settefisk AS og Steinvik Rensefisk AS. Produksjonen av matfisk i sjø vert driven av Steinvik Fiskefarm AS, som har seks ordinære matfiskkonsesjonar. I tillegg driftar Steinvik Fiskefarm Visningssenter AS ein eigen visningskonsesjon. Desse konsesjonane er fordelte på ni lokalitetar i Kinn og Askvoll: Hovden, Veiesundet, Klavelandet, Ålvora, Sveholmane, Seljeseth, Steinvik, Kviteskjeret og Hella. Målet er å produsere om lag 8000 tonn matfisk årleg.

Visningssenteret har som føremål å formidle kunnskap om havbruksnæringa til besøkande. Dette vert organisert som eit eige selskap, Steinvik Fiskefarm Visningssenter AS. Konsernet eig sjølv anlegga og eigedomane der drifta går føre seg gjennom eigedomsselskapa Breivika Eigedom AS, Steinvik Eigedom AS og Bru Eigedom AS. Onshore Aqua AS held til i Eikefjord og tilbyr rådgjeving innan




planlegging, prosjektering og bygging av landbaserte oppdrettsanlegg. Selskapet tilbyr rådgjeving både til Steinvik og til eksterne oppdrettarar i samband med utvikling og bygging av slike anlegg. Loke Eigedom AS er morselskap i konsernet og er eit holdings- og investeringsselskap.

Grunnlaget for denne rapporten er innføringa av Openheitslova, som trådte i kraft 1. juli 2022. Fleire av selskapa i konsernet er omfatta av lova, og dette medfører eit krav om å gjennomføre aktsemdsvurderingar i tråd med OECD sine retningslinjer for fleirnasjonale føretak. Desse vurderingane skal bidra til å førebyggje brot på menneskerettane og uakseptable arbeidsforhold – både i eiga verksemd, hjå forretningspartnarar og vidare nedover i heile leverandørkjeda.

Steinvik Fiskefarm AS og Barlindbotn Settefisk AS er ein del av Salmon Group – eit nettverk av 37 små og mellomstore oppdrettsselskap i Noreg. Nokre leverandøravtalar blir forhandla direkte av Steinvik, medan andre blir inngått av Salmon Group på vegner av medlemsbedriftene.

Gjennom dette samarbeidet oppnår vi stordriftsfordelar, særleg innan innkjøp. Salmon Group forhandlar om varer og tenester, og stiller felles krav til pris, kvalitet og berekraft. Eit døme er SG-føret, som byggjer på berekraftige råvarer og etiske krav til leverandørkjeda.

For Steinvik er desse felles avtalane viktige – dei omfattar sentrale innsatsfaktorar som fôr, rogn, vaksinar, medikament og forsikring, og utgjer om lag 31 % av dei totale kostnadene. Difor er Salmon Group sine aktsemdsvurderingar direkte relevante for verksemda, og det blir vist til deira rapport tilgjengeleg på nettsidene deira ([her](#)).



Forankring i retningslinjer og rutinar

Arbeidet med å sikre menneskerettar og anstendige arbeidsvilkår er forankra i konsernet gjennom prosedyrar for aktsemdsvurderingar og ansvarleg innkjøp, nedfelte i internkontrollen og Kvalitetshandbøkene. Etiske retningslinjer basert på ILO- og FN-konvensjonane er tilgjengelege digitalt og i papirform ved våre basar og kontor. Vi har òg ein «Supplier Code of Conduct», og jobbar med å styrkje formidlinga av denne internt og til leverandørar.

Leiar for prosjekt og berekraft gjennomfører årlege aktsemdsvurderingar med utgangspunkt i førre års transaksjonar, for å få oversikt over kritiske leverandørar. Resultat, mål og tiltak blir presenterte for styret og leiarar i generalforsamlinga, samt i interne leiarmøte. Tiltak blir følgde opp saman med nøkkelpersonar med personal-, økonomi-, og innkjøpsansvar, og status blir rapportert i leiarmøter og styremøter. Styret og dagleg leiar har overordna ansvar for å forankre arbeidet med aktsemd i konsernleiinga.



Det er òg relevant å vise til Salmon Group sine egne rutinar og retningslinjer, ettersom 31 % av konsernet sine innkjøp skjer gjennom rammeavtaler i regi av Salmon Group. Desse er nærare omtala i Salmon Group si eiga aktsemdsvurdering ([her](#)).

Slik gjennomfører vi aktsemdsvurderingar – metode og risikobilete

I tråd med §§ 4 og 5 i Openheitslova har Steinvik som mål å sikre ansvar for menneskerettar og anstendige arbeidsforhold gjennom forankring i styret og leiinga, og integrering i verksemda sine styringssystem og rutinar. Vi kartlegg og vurderer risiko for negative konsekvensar i eiga drift og hjå leverandørar og partnarar, med vekt på bransje, geografi, produkt, verdikjede og type verksemd. På bakgrunn av dette set vi i verk målretta tiltak for å førebyggje, redusere eller stoppe risiko, tilpassa alvor og omfang – som til dømes krav om forbedring, endring av praksis eller avslutning av samarbeid. Verksemda overvakar effekten av tiltaka så langt kapasitet og tilgjengeleg informasjon tillèt det, med sikte på kontinuerleg forbedring.

Risikofaktorar

Steinvik vurderer leverandørar ut frå eit sett risikofaktorar som til saman dannar eit samla risikobilete. Desse avgjer kva risikokategori leverandøren blir plassert i. Hovudfaktorane er:

- **Bransjerisiko:** Nokre bransjar har høgare risiko for brot på menneskerettar og dårlege arbeidsforhold, til dømes tekstil, bygg og anlegg, eller råvarebasert produksjon.
- **Produktrisiko:** Enkelte produkt og tenester inneber auka risiko grunna produksjonsmetode eller ukjend opphav, til dømes bruk av naturressursar eller kjemikaliar.
- **Geografisk risiko:** Risiko knytt til landet eller regionen leverandøren opererer i, inkludert politisk stabilitet, rettstryggleik og grad av korrupsjon.
- **Verdikjederisiko:** Aukar når leverandørkjeda er uoversiktleg, eller inneheld mange ledd som underleverandørar og mellommenn.
- **Verksemdsspesifikk risiko:** Risiko knytt til leverandøren sjølv, som dårleg internkontroll, historikk med brot på rettar eller manglande openheit.

I tillegg til desse hovudfaktorane vurderer Steinvik følgjande forhold for å få eit meir presist bilete:

- **Bindingstilhøve:** Kor avhengige vi er av leverandøren, og kor lett det er å byte.
- **Transaksjonsvolum:** Økonomisk omfang av handelen med leverandøren.
- **Relativt transaksjonsvolum:** Del av leverandøren si totale omsetning som kjem frå Steinvik – det seier noko om vår påverknadskraft.

Steinvik vurderer også finansielle forhold, som leverandøren si omsetning, samt kvaliteten og innhaldet i leverandøren sin eigen rapport etter Openheitslova (for dei som har rapporteringsplikt). På bakgrunn av den samla vurderinga vert leverandørane plasserte i risikokategoriane låg, middels eller høg. Leiar for prosjekt og berekraft gjennomfører årlege aktsemdsvurderingar, basert på eit internt rammeverk for risiko utarbeidd i tråd med OECD-modellen. For leverandørar med høg risiko vert det gjennomført jamlege vurderingar.

Ansvarleg drift – Vurdering av eiga verksemd og risikobilete

Steinvik er tredjeparts sertifisert etter GLOBAL GAP (**GGN**) standaren, noko som stiller strenge krav til menneskerettar. Under Global GAP sertifiseringa vert det også gjennomført ein GRASP – revisjon. Dette er ein gjennomgang av dei sosiale tilhøva i konsernet. Desse sertifiseringane gir eit grunnlag for ekstern vurdering av praksis. Sertifiseringane finn ein i Global GAP sin database, GGN-nummera:



- | | |
|-------------------------------------|---------------|
| - Steinvik Fiskefarm | 4056186291240 |
| - Steinvik Fiskefarm Visningssenter | 4063061380739 |
| - Barlindbotn Settefisk | 4050373741112 |

Helse, miljø og sikkerheit (HMS)

Arbeid i havbruksnæringa inneber høg risiko – berre fiskerinæringa har eit meir utsett arbeidsmiljø. Fall, klemskadar og belastningsskadar er vanlege årsaker til fråvær og skadar (FHF, 2024). Difor har HMS høg prioritet i konsernet, særleg innanfor produksjon av matfisk i sjø, der risikoen er størst.

Konsernet har etablert ei rekkje tiltak for å sikre eit trygt arbeidsmiljø:

- Internkontrollverktøy brukast til å registrere og lukke avvik
- Sikker-jobb-analyse (SJA) før større operasjonar
- Minst to personar ved arbeid på sjø
- Obligatorisk bruk av verneutstyr og korrekt handtering av kjemikaliar
- Internkontrollsystem med dekkande HMS-prosedyrar
- Alle driftsteknikarar har sikkerheitsopplæring
- Verneombod utfører jamlege rundar
- Styret og leiing får jamlege HMS-rapportar
- Tredjeparts revisjon gjennom Global GAP og GRASP
- Jamlege HMS-møter, og ein årleg HMS-dag i Steinvik Fiskefarm
- Arbeidsmiljøutvalet (AMU) i Steinvik Fiskefarm møtast to gonger i året

Resultat 2024 for konsernet: Sjukefråvær på 3,1 %. Ingen alvorlege skadar eller ulukker med langtidsfråvær.

Arbeidsmiljø og arbeidsvilkår

Steinvik nyttar ikkje innleigd arbeidskraft. Personell på mellombelse kontraktar får same vilkår som faste tilsette, i tråd med norsk lov.

I matfiskproduksjonen kan det i periodar vere større arbeidsmengde og behov for overtid, særleg på seinsommaren og hausten når lusepresset er spesielt høgt. Steinvik følgjer nøye med på bruken av overtid og har sett i verk tiltak for å redusere belastninga:

- Rekruttering og bemanningsplanlegging
- Aktiv bruk av avspasering
- Bruk av eksterne serviceleverandørar ved behov

Tiltak for å sikre eit rettferdig og inkluderande arbeidsmiljø i heile konsernet:

- Lønnstillegg ved fagbrev
- Gode forsikrings- og pensjonsordningar
- Kurs og opplæring
- Likelønn og likebehandling
- Rettmessig overtidsbetaling og bonusordningar
- Sosiale tiltak og låg terskel for varsling



Matfiskproduksjonen og settefisk/smoltproduksjonen er tredjepartssertifisert (Global GAP) og konsernet gjennomfører egne aktsemdsvurderingar. I 2024 er det ikkje avdekt brot på menneskerettar eller Inkluderande Arbeidsliv.

Kartlegging av leverandørkjeda – områder med høg risiko

I 2024 hadde Steinvik-konsernet totalt 530 leverandørar. Aktsemdsvurderinga omfattar alle leverandørar der vi har kjøpt varer eller tenester for over 500 000 kroner – totalt 92 aktørar som står for om lag 96 % av konsernet sine samla leverandørutgifter. Desse vert rekna som forretningskritiske og inngår i kartlegginga. I gjennomgangen vurderast også mindre leverandørar dersom det er tale om langvarige samarbeidspartnarar.

Ein stor del av konsernet sine leverandørar er lokalt forankra, noko som gir tettare samarbeid, betre kontroll og lågare risiko. Kartlegging basert på transaksjonsvolum viser at om lag 56 % av leverandørane er lokaliserte på Vestlandet, der rundt 32 % held til i tidlegare Sogn og Fjordane. Berre 2 % har hovudkontor utanfor Noreg. Denne geografiske forankringa legg til rette for god oppfølging og reduserer risiko for uakseptable arbeidsvilkår og manglande regulering.

Aktsemdsvurderinga i konsernet er delt opp i tre fasar:

Fase 1 – Sortering av leverandørar:

Leverandørane vart delte i fire kategoriar:

- Faste partnarar
- Leverandørar via Salmon Group-avtalar
- Interne konsernselskap
- Prosjektbaserte leverandørar

Etter gjennomgang stod vi att med 72 relevante leverandørar for vidare risikokartlegging.

Fase 2 – Risikovurdering:

Vi vurderte risiko basert på:

- Geografisk lokalisering og driftsområde
- Bransje og produkttype
- Kompleksitet i leverandørkjeda og underleverandørar
- Omdømme og ESG-profil
- Kvalitet, innhald og funn i egne aktsemdsvurderingar (der dette finst)
- Steinvik sitt kjøpsvolum relativt til leverandøren si omsetning

Etter vurderinga blei 16 leverandørar identifiserte som potensielt risikoutsette. Risikoen er særleg knytt til faktorar som bransje og produkttype, kompleksitet i leverandørkjeda, omdømme og mangel på openheit. Av desse har 10 offentleg publisert egne aktsemdsvurderingar for rekneskapsåret 2023. Totalt 14 av leverandørane opererer i utlandet, anten gjennom eiga verksemd eller via leveransar til kundar.



Fase 3 – Risikoklassifisering:

Desse 16 leverandørane blei delt inn i tre risikonivå:

Låg risiko

Éin norsk leverandør med god dokumentasjon, sertifiseringar og oppfølging av eiga verdikjede.

Middels risiko


11 leverandørar, hovudsakleg norske aktørar med global og kompleks verdikjede. Risiko knytt til råvarer som fôringrediensar, metall, plast og elektronikk, samt tenesteleverandørar med HMS-risiko. Dei fleste har aktsemdsvurderingar og tiltak på plass. Tre leverandørar utan offentleg, tilstrekkeleg informasjon har svart på vår spørjeundersøking, noko som reduserte risikoen.

Høg risiko

Fire leverandørar med utilstrekkeleg openheit eller tilknytning til høgrisikoforhold:

- Ein norsk aktør innan teknisk utstyr, med mangelfull informasjon
- To globale tenesteleverandørar innan finans/forsikring med omdømmerisiko
- Éin fôrforhandlar med utilstrekkeleg innsikt i råvarekjelde frå underleverandør

Potensiell risiko



Potensielle risikoar i leverandørkjeda

Basert på Steinviks aktsemdsvurdering over, og [Salmon Groups](#) aktsemdsvurdering, er det særleg tre område som peikar seg ut med høgare ibuande risiko:

- Fôr og råvarer
- Finans/forsikring med global eksponering
- Teknisk utstyr

Fôr er vurdert som det området med høgast ibuande risiko i leverandørkjeda, grunna ei global og kompleks verdikjede med varierende sporbarheit og fare for brot på arbeidstakar- og menneskerettar.

Steinvik kjøper i hovudsak fire typar fôr; SG-fôr gjennom Salmon Group og fôr utanfor denne rammeavtale; aurefôr, økologisk fôr, og rensefiskfôr. Sistnemnde fôr og tilhøyrande leverandørar vert vurdert og følgd opp av Steinvik.

Innanfor Salmon Groups rammeavtale

SG-fôret er utvikla av Salmon Group og vart i 2024 levert av Biomar og Skretting. Steinvik har nytta Biomar som leverandør av SG-fôret i 2024. Det stillast krav til sporbarheit og sertifisering, og leverandørane har som mål å vere ASC Feed-sertifiserte innan utgangen av 2025. Det er avdekkta høg risiko i fleire av råvarene som inngår i fôret.

- **Marine råvarer (fiskemjøl og fiskeolje):**
Risiko for IUU-fiske (ulovleg, uregulert, uregistrert fiske), tvangsarbeid og svak dokumentasjon. SG-resepten stiller krav om sertifisering gjennom MSC, Marin Trust eller FIP



(Fishery Improvement Projects). I 2024 vart det ikkje påvist brot på menneske- og arbeidstakarrettar.

- **Soya frå Brasil:**
Knytt til avskoging, urfolksrettar og uakseptable arbeidsforhold. Det vert stilt krav om at råvarene skal vere GMO-frie og sertifisert gjennom ProTerra. Ingen brot vart registrert i 2024.
- **Guar frå India:**
Risiko for barnarbeid som følgje av småskalaproduksjon på familiebruk. Biomar har gjennomført fysiske revisjonar utan at det vart funne avvik.
- **Kveitegluten og mikronæringsstoff frå Kina:**
Identifisert som område med potensiell risiko for menneskerettsbrot. Denne kategorien vart kartlagt som potensiell risikofull i 2024, og den potensielle risikoen vil bli følgt opp i 2025.

Utanfor Salmon Groups rammeavtale

Aurefôr og økologisk fôr vert kjøpt frå Ewos AS (Cargill), utanom Salmon Group sine rammeavtalar. Fôret vert produsert ved ASC-sertifiserte fabrikkar i Noreg og Skottland, som stiller krav om ansvarleg bruk av marine råvarer og etterleving av OECD sine retningslinjer for fleirnasjonale selskap.

Cargill har gjennomført egne [aktsemdsvurderingar](#) som har avdekt risiko knytt til fleire råvarer, mellom anna guar frå India, fiskeolje frå Mauritania og Oman, linfrø- og rapsolje frå Kviterussland og Russland, samt kveitegluten frå Russland. Cargill følgjer opp leverandørar i særleg risikoområde. Mat og råvarer frå Russland er unnateke frå sanksjonar etter EUs forordning 833/2014, som gjeld i Noreg. Steinvik vurderer likevel slik import som risikofyllt, og dokumentasjon frå Cargill viser at Steinvik ikkje har brukt russiske råvarer i 2024.

Det økologiske fôret har råvarer i tråd med EUs regelverk for organisk produksjon (EUs forordning 848/2018). Marine ingrediensar er frå Europa og er Marine Trust-sertifiserte. Guar og soyaolje frå Asia og Vest-Afrika vert framleis rekna som råvarer med ibuande risiko, og inngår i leverandørens systematiske vurderingar. Denne risikoen vert følgt opp gjennom skjerpa aktsemd og krav om dokumentasjon frå aktuelle leverandørar.

Alt fôret er ProTerra-sertifisert og skal ikkje ha råvarer frå avskoga område. Samstundes er det ein generell omdømmerisiko knytt til Cargill som konsern, grunna omfanget av deira globale verksemd.

Jamfør Cargills aktsemdsvurdering er det ikkje avdekka konkrete brot på menneskerettar i 2024, men risiko for uakseptable arbeidsvilkår er framleis til stades i delar av leverandørkjeda.

Spesialfôr til rensefisk

Fôret til rensefisk vert nytta i mindre volum, men vert vurdert å ha høgare risiko på grunn av manglande dokumentasjon og uoversiktleg verdikjede. Ei ny vurdering viser at enkelte marine råvarer, som blekksprutmjøl frå Sør-Amerika og fiskegelatin frå Sør-Aust-Asia, har opphav i område med utfordringar knytt til overfiske, svak regulering og risiko for brot på menneskerettar. Dette viser behovet for strengare krav til dokumentasjon og verifikasjon i leverandørkjeda. Vi arbeider vidare med å kartlegge opphavet til råvarene og å krevje dokumentasjon frå våre leverandørar.

Steinvik har ikkje avdekt brot på menneskerettar eller anstendige arbeidsvilkår i fôr kjøpt utanom rammeavtalar i 2024. Arbeidet med aktsemdsvurderingar held fram, med mål om å sikre at alt fôr som vert nytta er i tråd med Openheitslova og internasjonale standardar for berekraft og etisk



handel. Dette inneber tett samarbeid med Salmon Group og egne vurderingar av leverandørar, med krav om dokumentasjon, sporbarheit og relevante sertifiseringar.

Andre områder med risiko – Forsikring/finans og teknisk utstyr

Finans og Forsikring:

Ved bruk av tenester frå multinasjonale konsern, er det avdekt risiko for indirekte medverknad til menneskerettsbrot og uetisk praksis, særleg der morselskap opererer i land med låg regulering og transparens. To aktørar i vår kartlegging, og som har etablert omfattande due diligence-prosessar, har likevel vore knytt til kontroversielle investeringar og prosjekt, mellom anna i Midtausten og Aust-Afrika. Det eine selskapet har sidan endra praksis.

Det relative transaksjonsvolumet er lågt, og det ser ut til å vere få alternative leverandørar. Vi følgjer med på utviklinga og vil vurdere nærare oppfølging dersom det skulle oppstå vedvarande utfordringar.

Teknisk utstyr:

Ein norsk leverandør av teknisk utstyr har risiko knytt til innkjøp av råvarer som metall og elektroniske komponentar frå sine underleverandørar. Leverandøren er ikkje omfatta av Openheitslova, og det finst avgrensa informasjon om korleis leverandøren handterer risiko for brot på menneskerettar og uverdige arbeidsforhold.

Særleg gjeld dette bruk av konfliktmineral i metallproduksjon, som kan vere knytt til tvangsarbeid i gruver, til dømes i afrikanske land. Produksjon av elektroniske komponentar i asiatiske fabrikkar kan òg vere prega av dårlege arbeidsvilkår.

Steinvik har sendt eit spørreskjema til leverandøren for å hente inn meir informasjon og for å gjere ei nærare risikovurdering.

Tiltak og mål for ansvarleg drift – slik jobbar vi med forbetring

Langsiktig arbeid: Steinvik jobbar for å redusere risiko i leverandørkjeda gjennom langsiktige partnerskap. Gjennom Salmon Group får vi stordriftsfordelar og påverknadskraft som vi brukar til å påverke leverandørar i rett retning. Vi ønskjer også å nytte lokale leverandørar med oversiktlege verdikjeder der det let seg gjere – både gjennom rammeavtalar og for å støtte levedyktige lokalsamfunn.

Dersom vi over tid har låg påverknad (til dømes lågt relativt transaksjonsvolum) og høgrisikoleverandørar viser lita vilje til samarbeid og endring, vil vi vurdere å avslutte samarbeidet.

På kort sikt og der vi manglar informasjon, nyttar vi desse tiltaka:

- Dialog med leverandørar, ofte gjennom direkte kontakt og besøk
- Innsamling av informasjon, t.d. spørjeundersøkingar
- Etterspurnad etter sertifiseringar og tredjepartsverifikasjon
- Kartlegging av råvareopphav og sporbarheit

Vi vurderer leverandørar årleg, høgrisikoleverandørar jamleg, og set inn tiltak ved behov.



Målsetjingar og status for vidare arbeid med Openheitslova

Målsetjing	Status
Systematisk oppfølging av høgrisikoleverandørar, med krav om dokumentasjon og konkrete utbetringstiltak	Under arbeid
Styrkje intern kompetanse for å forbetre ansvarleg og berekraftig innkjøpspraksis	Under arbeid
Gjennomføre årlege sporbarheitstestar på utvalde førråvarer med kjent risiko	Under arbeid
Forbetre ekstern kommunikasjon og signering av vår Supplier Code of Conduct med leverandørar vi har høgast volum med	Før juni 2026
Forbetre metodikken for aktsemdsvurderingar for å styrkje presisjon og objektivitet i risikovurderingane	Før juni 2026

Styret og dagleg leiar har overordna ansvar for å forankre arbeidet med aktsemd i konsernleiinga, medan leiar for prosjekt og berekraft har ansvar for gjennomføring, oppfølging og overvaking av effekt og måloppnåing. Resultat og tiltak blir kommuniserte internt i konsernet, med særleg vekt på styret og leiing.

Kommunikasjon med påverka partar og rettshavarar

Det er ikkje avdekt konkrete brot på menneskerettar eller anstendige arbeidsforhold i 2024, men enkelte risikoar vert framleis overvaka.

Gjenoppretting og erstatning

Det er ikkje avdekt forhold i 2024 som har kravd oppretting eller erstatning. Dersom det vert identifisert brot på menneskerettar i leverandørkjeda, vil Steinvik krevje utbetring innan ein gitt frist. Ved manglande respons kan samarbeidet bli avslutta.



Dokumentet er godkjent av:

Signert av styret:

Steinvik Fiskefarm AS, Steinvik Fiskefarm Visningscenter AS, Steinvik Rensefisk AS, Barlindbotn Settefisk AS, Breivika Eigedom AS og Bru Eigedom AS

Alf-Helge Aarskog
Styreleiar

Inge Helge Vassbotten
Styremedlem

Marte Vassbotten
Styremedlem

Signert av leiinga:

Steinvik Rensefisk AS, Steinvik Fiskefarm Visningscenter AS, Breivika Eigedom AS, Bru Eigedom AS

Alex Vassbotten
Dagleg Leiar

Barlindbotn Settefisk AS

Reidar Haugen
Dagleg leiar

Steinvik Fiskefarm AS

Erlend Vassbotten
Dagleg leiar

